

बुद्ध धृष-जन्म कथा



दीपंखा

यस्य पुस्तक बुद्ध धृष-जन्म कथा व दीपंखाया मइत्त व्हासीकेणु ।

श्रीः

बुद्ध वृष-जन्म कथा

अनुवादकः—

वैद्य श्री पं. आशाकाजी वज्राचार्य
ल. पु. अथननि,

प्रकाशकः—

धारणी संघ, पश्चिम १ नम्बर, साँगु बजार

व

स्वर्गीय साहु, भी बेखामान्सि शाक्य
ल. पु. इकुलि निवासी.

श्री बुद्ध सम्बत् १४६७
श्री नेपाली सम्बत् ... १०७३
श्री विक्रम् सम्बत् २०१०

प्रथमवार १०००

मूल्य । ५०

था:गुथाय्—

श्री ज्ञानरत्न, अभयानन्द बज्राचार्य,
श्री वागीश्वर छापाखाना, कान्तिपुर, नेपाल ।

निवेदन

संसार धैगु छगू परिवर्तन स्वः, अये
जूसानं श्री शाक्यमुनि बुद्ध भगवान् हापा
कपिल पुर धैगु नगरे जन्मजुया आपालं
चाःउला धर्मचक्र प्रवर्तनयाना असंख्य शिष्य
गणपिन्त चेप्यदोल लाख (८४०००००)
ग्रन्थ अर्थान् शून्यताज्ञान, तथताज्ञान,
निर्वाण महा मोक्ष ज्ञानमार्ग व हापाजुया
वंपिं बुद्धभगवान्पिंगु ज्ञानमार्ग थःगु जन्म-
चरित्रावदान अनेक धर्म कथा आपालं
ठ्याख्यानयाना बिज्याना बन ।

अजागु सीका थौया अद्यापितकं बिदेशी
देश देशान्तरंनिसें बिद्वान् त थन नेपाले वया,
बौद्ध ग्रन्थावदान सफूत यंकावं चोन
तिनि, तथापि बौद्ध सिद्धान्त ज्ञानमार्गया
सफूत अजनं थन आपालं दनिगु खने दु ।
केवल सत्ययुगे दीपंकर बुद्ध भगवान्या
पर्यायस शाक्यमुनि बुद्ध भगवान (वृष)
जुया जन्म काःगु खँ छगू चिकिधंचाजूसानं
छोतकरि नेवा भाषां अनुवादयाना ।

भवहे खँ बंशावलिनं पूर्णरूपं चोयातगु
 दु । यदि सकसिनं दीपंखा वनेगुया महत्व
 पूर्णरूपं सीका कायि धैगु आशायाना,
 सकलयागु सहयोगं थौं थव सफू प्रकाश
 जुल । थुकि ज्ञानिगुणि तेसं अजनं सहयोग
 बिया धन्यवाद यायि धैगुनं छगू तःधंगु
 पूर्णआशा दुः ।

थौं कन्हेया समय निग ध्येवा
 खचेंयाना सफू स्वेमफुपिं यको दु । उकिं
 दुपिसं केहि चन्दा निचाजुल धासा मदुपिन्त
 बिना मूल्य सफू छगू निगू प्रदान यायेदै ।
 थुमिमन गुलिजक हर्ष ज्वी, सफूनं स्वेदत,
 चन्दातःपिन्त पुरयनं प्राप्त ज्वी धैगु बिचारं
 चन्दा द्वारा थव सफू प्रकाश जुल । थुगुरीतं
 मेमेगुनं प्रकाशयायेगु इच्छा दु, निवा
 सकलया खः ।

—लेखक

❀ बुद्ध वृष-जन्म कथा ❀

मङ्गलाचरणम्

बुद्धस्तोत्र

चतुर्मार प्रणाशाय जनानां सुख हेतवे ।

निर्वाणसिद्धि लाभाय तपचर्यकृतं भवान् ॥ १

वैद्यो हि सर्वलोकानां सत्वानां दुःखमोचकः ।

व्याधीनामौषधरूपं प्राणीनां रोग हारकः ॥ २

पाप पङ्क निमग्नानां घोर संसार पारकः ।

अज्ञान तिमिरान्धानां प्रज्ञादीपं त्वमेव हि ॥ ३

अहिंसायां गुरु बुद्धः क्लेश सागर तारकः ।

स्वभावशुद्ध धर्माणां शून्यताज्ञान धारकः ॥ ४

पापानांमूल हिंसायां विरक्तः शान्तरूपकम् ।

संम्यक्संबुद्ध सर्वज्ञ वन्देऽहमपि त्वां विभो ॥ ५

(अर्थः)

स्कन्धमार १, क्लेशमार २, मृत्युमार ३, देवमार ४
 ध्व प्यंगु भयंकर मारयात नाशयाना अर्थात् त्याका, सकल
 जनयात सुख ज्वीगु (किन्तु) मोक्ष मार्ग क्यनेगु कारणे
 धर्मचक्र १, मोक्षसंभोगचक्र २, महासुखचक्र ३,
 निर्वाणचक्र ४ ध्व प्यंगु तःधंगु महासिद्धि लायेत तपचर्थं
 १, दुष्करचर्थ २, आस्फाणयोगचर्थ ३, समाधियोगचर्थ ४
 ध्व प्यंगु महा सिद्धिलाना विज्याये धुंहुल्ल छलपोल ॥ १ ॥
 हानं स्वर्ग, मर्त्य, पाताल वासी देव, दैत्य, मनुष्यादिया
 वैद्यराज जुया, अवश्य मेवनं दुःख मोचनयाना, दक्क
 रोगया अमृतरूपी वासया रूपजुया, प्राणिते दुःख ज्वीगु
 रोगयात हरणयाना वा लायेका, सुखरूपी निरोगीयाना
 विज्यायिह्म छलपोल ॥ २ ॥ हानं पापया भुतुनाले दुना
 च्वंपिं सकल पापीष्टतेत ध्व घोररूपी अनित्यगु संसारं
 पारयाना, अज्ञान धैगु ख्यूँसे च्वंगु अन्धकारे लाना कांजुया
 च्वंपिन्त तःध्वागु अति तेजस्वी ज्ञानयागु मतजुया विज्याह्म
 छलपोल हे छल्लजक अवश्यनं सः ॥ ३ ॥ हानं सकल

प्राणिगण थःसमान धका करुणाया मिखां खंका, मुख
ज्वीगु अहिंसा धैगु थजागु धका ज्ञानमार्ग कयनेगुलि सःअ
महा पाण्डित्य गुरु जुया, (६४) लाख कलाशास्त्रं
पार ज्वीधुंकुह, षट्पारमितां पूर्ण ज्वीधुंकुह, षट्मिहं पूर्ण
ज्वीधुंकुह, दशवलं सहित ज्वीधुंकुह, (८०) सुलक्षणं
युक्तं महाज्ञानि स्वभावशुद्धं, समुद्रथ्ये गंभीरगु धर्मयाना
विज्यायेधुंकुह, सुमेरु पर्वतथ्ये निश्चल मनयाना, बज्रथ्ये
कवचगु देह धरेयाना, शून्यताज्ञान धारणायाना विज्याकह
छलपोल ॥ ४ ॥ हानं पापया मूल हिंसाकर्मस विमुखजुया,
सहयायेगुलि राजाजुया, शान्त रूपधरेयाना विज्याकह प्रभू
छलपोल खः । भो सम्यक्संबुद्ध ! भो सर्वज्ञ ! हे विभो !
भो मालिक ! छलपोलयात जिनं दण्डवत् प्रणामयाना
जुल ॥ ५ ॥



(नेपाली भाषा श्लोक)

संसारधैगु गय्च्चंगु भीगु
स्वैगु अधीने चोना चोनीगु ।
मार धयापिं ह्यसीके मागु
भंभं थुमीगु वसे चोनीगु ॥ १ ॥
बुढा जुयेगु रोगं कयीगु
सिनालिनं जन्म मेगु काय्गु ।
नेगु तोनेगु पुनेगु तीगु
जिगु थ्वधैगु यनेगु छूदु ॥ २ ॥
ह्मेकंयादुने गथे खनीगु
न्ह्यो वैबलेनं स्वप्ने खनीगु ।
बुद्धं थ्व धागु ह्यसीके मागु
अनित्यधैगु लुमंकेमागु ॥ ३ ॥
मोक्षधयागु भीपिं वनीगु
समाधि योगं याक्नं थ्यनीगु ।
निर्वाण चक्रे वने फयीगु
थुजोगुमार्गे भीपिं चोनेगु ॥ ४ ॥

ॐ नमो रत्नत्रयाय

शुद्धोदनस्य अपत्यं पुमान् शौद्धोदनिः
तस्मै शौद्धोदनये नमः ॥

(थनंनिसे कथाऽऽरम्भ)

एकस्मिन् समये भगवान् श्रावस्त्यां
नगर्यां अनाथपिण्डिक सार्थवाहस्याऽऽरामे
विहरतिस्म ।

(अर्थः)

पूरा पूर्व काले श्रावस्ती धैगु नगरे अनाथपिण्डिक
धयाह्व तःधंह्व महाजन छह्व दु । थ्व महाजन अति कृपालु
ज्ञानि विद्वान् बुद्ध भक्ति दाता थजाह्व सार्थवाहया (आरामे)
बगीचास श्री शाक्यमुनि भगवान् बुद्ध विराजमानजुया
विज्यात । थुगु समये वसपोलया अमृतरूपी कथा
बोधिज्ञान न्यनेगु इच्छायाता ब्रह्मा, विष्णु, महादेव, इन्द्र,
धृतराष्ट्र, विरुढक, विरुपाक्ष, वैश्रवण, कुवेर, यमराजा,
गन्धर्व, विष्णु, महोरग, विद्याधर, यक्षगण, ऋषिदिग लोक-

पालपिं, देवकन्या, वरुणनागादि नागकन्या, अप्सरागणपिं
 हानं अपरमितादि देव पुत्रपिं, मुनिश्वरादि बोधिसत्वपिं,
 सप्तपिं, राजा, मन्त्रि, महाजन, पण्डितगणपिं सकल वया
 भगवान् बुद्धया आश्रम (त्रिप्रदक्षिणा) सोचा चाउला,
 पलेस्वां थ्ये सुगन्ध वासनावगु पादुकाम सकसिनं भोपुयेधुंका
 जःगु लाहा थगांन्यथा पृथिवीस जःगु पुलिंचुया, स्त्रीगणपिनि
 खःगु पुलिंचुया जःगु पुलिथकया पुरुषपिनि खःगु पुलिथकया
 लाहानिपां हाजलपा विन्तियाना थःथःगु आश्रमे फेतुना
 भगवान् बुद्धया ख्वा सोया चोन । तथा दानवादि दैत्यगणपिं
 कौणपादि राक्षसगणपिं, मेमेपिनं वया थ्वहे रीतं वन्दनायाना
 थःगु आश्रमे फेतुना बुद्ध भगवान्या मुखमण्डल जक सोया
 चोन । एवं न्यासल भिक्षुगणपिं, थः शिष्यगणपिं, अन्य
 उपाशिकोपाशिकादि भिक्षु भिक्षुणी नारिगणपिं, सकल
 वया अथे हे दण्डवत् प्रणामयाना छ्वा ख्यलं चोना थःथःगु
 आश्रमे फेतुना वसपोल भगवान् बुद्ध गुरुया ख्वा
 सोयाचोन ।

उगुवस्वते जवे शालिपुत्र स्ववे महामौङ्गल्यायण चामलं
 गायेका चोन । आनन्द भिक्षु काश्यप भिक्षु अग्रस चोना
 यथाक्रमं वासयाना चोन । थुगु समये आयुष्मान् भिक्षुपुंग-
 व आनन्द महाभिक्षु थःगु आश्रमं दनावना भगवान् बुद्ध

गुरुया आश्रम सोचा चाउला, ताउति पादुकास भोःपुया,
लिपा पुलिं निगोलं पृथिवीस चुया लाहा विन्तियाना थुगु
प्रकारं विन्तियात ।

भो भगवन् ! हे शास्ता सर्वज्ञ गुरु ! श्री स्वयंभू
चैत्ययात पूजायायेगु वा चाउलेगु छुछुदिने उत्तम आज्ञाजुया
विज्याहुँ । थ्व खँ न्यना भगवान् बुद्धं आज्ञाजुया विज्यात ।
आयुष्मन् हे आनन्द महाभिक्षु ! चैत्य पूजाया प्रशंसा आपालं
दु । तथापि किञ्चित्प्रमाणं कने, एकाग्र चित्तयाना न्य ।
गथेधालसा मेमेगुदिने दलछि पूजादियानागु वा चाउलागु
व आश्विन शुक्लया पुहीखुन्हु दिने वा रात्रिस छक
पूजायानागु छचाजक चाउलागु पुण्य उर्थे ज्वी, मेमेपि
देवतादि दलछिधा पूजायानागु व चैत्यालय स्वयंभू
भगवान् छक पूजायानागु उर्थे ज्वी, विशेषं चैत्य सेवायायेगु
पूजादि प्रदक्षिणायायेगु आश्विन पुहीखुन्हु अत्युत्तम धका
सीकी । ह्यापा जि राजा महाजन अनेक ब्राह्मणादि कुले
जन्म कया चैत्य देकावया, चैत्य जीर्णोद्धार यानावया, छगः
निगः जक मखुः दलंदो चैत्यविम्ब सँस्कारयाना वया, थ्वहे
आश्विन पुहीखुन्हु अहोरात्र व्रत चोना पंच तथागत
भगवान् श्री स्वयंभू धर्मधातु वागीश्वर दक्ष चैत्य पंचबुद्ध
पूजादियाना प्रदक्षिणायाना पिण्डपात्र दहलपा अर्घयाना

तूर्य आदि पौगा शंख प्वीका, काहा प्वीका, पंचबाजा नव बाजादि थाका, चैत्यया अग्रस व्रत चोना शरीर समेतं छोयेहा दीप दानयाना वया, श्वहे पुण्यं थौं जि भगवान् बुद्ध तथागत धायेका चोने दत्त ।

आनन्दभिच्छुं हानं विन्तियात् । भो भगवन् ! पौगा, काहा, मेरी प्वीका शंखनादयाना बाजा थाना वनेमागु कारण छु दु ? छु नामकया वनेगु ?

भगवान् बुद्धं आज्ञादयेकल । भिक्षु पुंगव आनन्द महाभिक्षु ! छं गथेमसिल, तर छं धागु खः कारण दु ।

पाक, लाती, ख्वाँय्, कांपिं, रोगीत यदि बन्धने लानाचोंपिं, खुत्यांपिं, तुतिमदुपिं, थजापिन्तनं त्रिरत्तोच्चारण याकेया कारणे अथवा न्यंकेया कारणे प्रसस्त ज्वीक शब्द पिहँवैगु बाजा थाका, तूर्यादि प्वीका, शंखनादयाका, काहा प्वीका हेव हेव यंकेगु शब्दोच्चारण यायेगु थथे प्रमाण—

बुद्धं धर्मं च शंघं च भजामि सर्वदा ध्रुवं ।

तारांजिनेश्वरीञ्चैव नौमि मां तारय प्रभो ॥ १

बुद्ध धर्म संघ यात सदाकालं सेवायाये, भजनायाये, सदानं लुभंके । जिनेश्वरी आर्यतारा देवीयातनं नमस्कार याये । हे प्रभो ! मां तारय, जित याक्कनं तरेयाना बिज्याहुं ।

(किन्तु) वर्तमान बैला वनेबले घलःपाः थाना वनेगु प्रमाण थ्वहे खः धका सीके ।

त्रिरत्न शब्दोच्चारण वाजाया शब्द न्यनागुलि वाप नाश ज्वीगु । नीचकुले जन्म ज्वी भ्वालीगु । तीर्यक पशु, पंछि, कां, खू, धुसि, अलक्षणीजुया जन्म ज्वी मखु । पाक, लाती, ख्वाँय, असिद्धि, दारिद्र, दुःखी जुया जन्म काये माली मखु । हानं लोकेश्वर करुणामययागु हृदय मन्त्र (षडक्षरि) मन्त्रनं बोनेमसःपिं, लाता, लातीतेत बोनागु तुल्ययायेत (माने हियकेगु) धका सीके । थ्व खँ न्यना हानं आनन्द भिक्षुं विन्तियात ।

मोनाथ गुरु ! आश्विन पुहीखुन्हु चैत्य सेवायायेगुया महत्व जिमिसं सीके धुन, आः हानं थ्वहे पुहीखुन्हु हानं (गन्धमादन पर्वते) सिद्धजूह्व नीलधुः वृषाकार गथे जुल, थ्व गनंवह्व थ्वीतनं वहे दिने मंगलोत्सव पूजादि कर्मयाये मागु छुयाकारणे ज्वी ? मेमेगु दिनेनंजी मागु खः । थुकीयागु महत्व पूर्ण रूपं जिमिसं मखिया चोन ।

मम संदेहनाशाय वदस्व जिन गौतम ।

हे जिन ! भो गौतम गुरु ! जिगु मनया संदेहयात आनन्दयाना विज्याहुँ, थन थुलिमछि ब्रह्मादि देव,

दैत्य, मनुष्यादिपिं आपालं वया छलपोलया अमृत
वचन कथा न्यनेगु ईच्छायाना थन वयाचोन, थुपिं
सकलयातनं मनानन्द ज्वीगु याकनं आज्ञादयेका विज्याहुँ ।

भगवान् सर्वज्ञ गुरुं आज्ञादयेका विज्यात ।

साधु साधु महानन्द आयुष्मान् भिक्षु पुंगव ।

हे महा आनन्द ! आयुष्मन् भिक्षु पुंगव ! धन्य धन्य
छ सकलयागु मन आनन्द ज्वीगु खँ न्यने सःख साधु
महाज्ञानि छं एकाग्रचित्तपाना न्य ।

अथ भगवान् सपार्षद मवलोक्य

कालमपिज्ञात्वा प्राह ।

पुरा वन्धुमती पूर्या रूयाता दीपङ्करोदये ।

वृषजन्मावदानं च पाण्डित्य ब्राह्मणकुले ॥

मृत्यु जन्म जराक्रान्ते रुज दुःखोऽस्मिसंकुलं ।

तवासां पूरयिष्यामि शृणु लोकार्थ हेतवे ॥

इत्यादि ।

थनंलि भगवान् बुद्धं सक्रमनं विचारयाना, समय
काल संपूर्ण सोया, दिव्यचक्षु कना, थुगु प्रकारं

आज्ञा दयेका विज्यात । गथ्ये धालमा- ह्यापा पूरापूर्वकाले
अर्थात् सत्ययुगे दीपङ्कर महा बुद्धया उदये (वन्धुमती)
धयागु नगरे आपानं सःह्य महा पाण्डित्य ब्राह्मण
छह्य दु । थ्वीगु कुले सा छह्य लहिनातल, थ्व साया
गर्भं वृष छह्य जन्म जुल । थ्व (वृष) दोहचा जन्म
कया, सुख दुःखया अनु भोगयाना, मचा, व्याय्म, बुढा
ज्जीकां रोग धैगुनं हसीका, वनान्तरे अकालं मृत्यु जुया
वंगु संपूर्ण छन्त कनेत्यना अथवा सकल लोकया
हितयायेया कारणेन विस्तारं कनेत्यना, सकसिनं
एकचित्तयाना न्य ।

गुजोगु प्रकारं गथे जुया वन धालसा- ह्यापा (कृतयुगे)
सत्ययुगे, श्रीमान् शास्ता महा गुरु भगवान् दीपङ्कर
बुद्धया पालाय्, वन्धुमती नाम जुया चोंगु देशे, अति नं
विद्वानह्य षट्शास्त्रे पारंगत जुया चोंह्य, अतिनं बुद्ध भक्तिह्य
महा ज्ञानी पण्डित ब्राह्मण छह्य दु । थ्वया स्त्री ब्राह्मणीनं
अतिनं आख वोना सेकाचोंह्य, सनी धर्मस चोना सत्य
धारीजुया, धर्म कर्मस निपुन जुया चोंह्य ब्राह्मणी स्त्रीनाप
थ्व ब्राह्मण काल दिन हना, दंपती सहितं नित्य त्रिरत्न
नामकया, श्री स्वयंभू धर्मधातु वागीश्वर चैत्य सेवायाना
चोन । थ्वया सन्तान मदुया निमित्ते (गौरवर्ण)

अतिनं यचुसे पिचुसे चोह्म, शंखध्ये तुयूगु वर्णह्म, खून
बुत्ता धैगु गनं मदुह्म, निर्मल ह्मह्मं तोयूह्म (गौमाता)
सा ह्मनं लहिना, नित्य पालन पोषणवाना, पूजायाना
गो भक्किनं जुया चोन— एवं कालदिन हना चोचों छन्दु थ्व
साया गर्भवती जुया वल, मासंपूर्णञ्जुस्यंलि छन्दु मचाबुल ।

लक्षणाभूषणं रूपं वृष रत्नाकरोनिधिः ।

लक्षणया तिसां तिया, अतिनं सुन्दर जुया, रत्नया
खानि दुगु पर्वत समानं सुलक्षणं पूर्णह्म । शंखध्ये च्वापुध्ये
निर्मल तोयूह्म, कोमल शरीर तेजस्वी यचुसे चिल्लोकना
चोह्म, छुंहे खून मदुह्म, हानं निक्क निपुनं नील रत्नध्ये
बच्चुसे चोंगु वर्णह्म, थुना छपु रंगं छिना तःगुध्ये ह्यांगु
वर्ण सहित जुया चोह्म, हानं म्येनं ग्वाः नयातगुध्ये ह्यांगु
वर्ण जुयाचोह्म, हेरा समानं तेज दुगु दन्त पङ्गी दुह्म,
मिखा निगोलं अति हाकुसे चोह्म, सुगन्ध वासना वह्म,
हाली वलेनं तःगोगु शंख प्वी वलेध्ये (शंखनाद)
भोगु शब्द जुया चोह्म (थुः) पुरुष दोहचा छह्म आश्विन
पुह्मीखुन्दु अश्विनी नक्षत्र क्यने साथ जन्म जुल । व देशे
(मूर्धुत) धौ निघौत्या संम रत्नवृष्टीनं जुल । वदेशे
चोपि प्रजा सकल धनि जुल । ब्राह्मण्या छेनं अनेक

धन द्रव्यादि अन्न, वस्त्र, रत्नादि ह्यापा मदुगु आपासं
 दया वल । वदेशया राजा, मन्त्रि, महाजन, प्रजान् थ्व
 जन्म जूह्म थुःचा सोत्रल । थ्व थुःचा सामन्य दोहचा
 मखु । साक्षात् दैवावतार काःवह्म खः भीगु देश पवित्र
 जुल । थ्वीत सकसिनं बांलाक विचार यायेमाल धका
 राजां नमस्कारयात, सकसिनं प्रणामयाना थःथःगु छेन्दिहा
 वन । सकल ज्ञानिगुणितेसं धंन्य धंन्य गुजोह्म थुःचा
 जन्म जुल धका हाल्ता प्रशंसायाना जुल । हानं थ्व
 ब्राह्मणयानं आश्चर्ये ज्वीकाचोन, ब्राह्मण विद्वान्ह्म जूया
 निन्ति सीका काल, धंन्य जिगु भाग्य जि सन्तान मदु
 सानं जिगु छे सुलक्षणह्म थुःचा जन्म जुल, दैवया अधीन
 कर्मया भोग खः छुछु ज्वी मागु ज्वी धका निह्म स्त्री
 पुरुषया सलायाना, ह्यापाया द्विगुण सायातनं मचायातनं
 विचारयाना पालन पोषणयाना थःगु छेया नित्याचार
 दिन हना चोन । १२ दिन खुनु सायात (नामाभिष्येक)
 विल । (रत्नमय कान्तिमति) थुः धका नाम छुना
 प्रचारयात, सकसिनं सिल । लिपा थ्व थुःचा तःधिकःनं
 जुया वल, विस्तारं तःधि जुया वह्म थुःचिगु प्रभावं
 ब्राह्मण अति धनाय जुया वल, नित्य दान प्रदानयाना
 गो भक्ति जुया चोन । लिपा थुःचा जन्म जुया दळि

दस्यंलि ब्राह्मणीया गर्भं पुत्रनं जन्म जुल । ध्व थुःचाध्वे
हे सुलक्षणं युक्तक्ष काय् जन्म जूगु खना, ब्राह्मण अत्यन्त
हर्षजुया, धन द्रव्यादि दानयाना, पुत्रयातनं (गुणाकर)
धका नाम छुना कालहना, निहत्त्यपु सुखनं दिनहना
धर्मयाना चोन ।

छन्हु स्त्रीया खासोया धाल, स्त्री भीजिस मनोरथ
पूर्ण जुल । नेगु, तोनेगु, पुनेगु दान प्रदान यायेगु धंदा
मन्त, पुत्रनं दत्त धका प्रमोद चित्तयाना अनित्य लुमंका,
सज्जन ज्ञानिपिन्त बाल वृद्ध वृद्धी रोगी दारिद्र गणपिन्त
दानयाना । ईश्वर भक्ति, गुरु भक्ति, गो भक्ति जुया काल
दिन हना चोन ।

थुगु रीतं ब्राह्मण व ब्राह्मणीया दुःख मदेका चोन,
जव ध्व कान्तिमति थुःचा युवनावस्थां पूर्ण जुयावल
पिहाँ वंसां चैत्य चाउला त्रिरत्न धका हाला प्याहाँ
वनीगु, द्वहाँ वःसां त्रिरत्न धका हाला द्वहाँ वयीगु, छेनं
प्रहरे प्रहरे शंखनाद स्वरं त्रिरत्न शरण धका तःसकं
प्रशस्त ज्वीक हालीगु चलन ।

ब्राह्मण्या निहत्त्यपु अति खुसि जुया चोनीगु,
अथेहे त्रिरत्नोच्चारणयाना दिन रात्रिया त्रिप्रहर गोथे
वना नमस्कारयाना त्रिन्तियायिगु (हे कान्तिमति थुः ! हे

रत्नमय वृष !) छलपोल मुखः जिं छुं मम्मू जित रत्नायाना
विज्याहुँ । थथे धया लिहाँ वयिगु चलन जुजुं थ्व
कान्तिमति थुः युवनावस्था विते जुया वस्यंलि मध्यमावस्था
जुल, छन्दु थ्वं रात्रिया त्रिप्रहरे विचारयाना सोत ।

अहो गुजोगु थ्व संसार, थ्व शरीर सो विकार
थ्व पशुया जन्मस वृद्धावस्था ज्वीक म्वायेमज्यू [किन्तु]
छायेषासा मनुष्यतेथे थितिमाया मदु, कमाय् पायेमस,
इलम मदु, काय् छेपिसं नकेदैगु मस्तु, थः सने मफै,
लहिनातह्म थुवाया भरोसाय् चोने माः ।

जि दोह पशु जात खः, सुनानं रत्नायायि मस्तुः ।
युवनावस्था फुना मध्यमावस्था जुल । थ्व काल दिन
धैगु नदी खुसी न्हावथे खः, हानं लिहाँवयि मस्तु ।
आः हानं थ्व मध्यमावस्था वितये जुया वस्यंलि
वृद्धावस्थाया समय ज्वीन, जि सनेमफैन, बुद्धा ज्वीक
म्वाना, सोयां सोये मयेका म्वाये धैगु छुं शोभा मदु ।
मकल छन्दु सी मानी अवश्य खः । जिनं छन्दु मृत्यु
ज्वी हे तिनि, छुः थ्व संसार धका थःथे थमं अनित्य
लुमंका धाल । हानं थुगु प्रकारं मनं खँ हात । अहो आश्चर्य
थ्व संसार भूठा, स्वप्नसमान छुं हे दुगु मस्तुः । थ्व शरीर
सो ला, हि, दा, केँ, चंगुर्ति भुना पंजदेकातल । थ्व पंजले

खिनं दु, चोनं दु, ध्व पंजरूपी शरीरे दुनेचोह्य प्राणीरूपी
भंग वोयावनीषले ध्व शरीर छु खयले दु, धिकार ।

फसे लागु मतथ्ये फवाक सिनावनीगु, थौला कहेला
वज्रमल जूयैथ्ये भयंकरह काल छु थ्येकान दुगु मखु ।
मदां म्वाये दुगु अवश्यनं मखु । जिगु घाघां जि धाघां
गुलि प्राणीपिं वन ज्वी, गुलि वल ज्वी, मितः धाल गनवनीगु
जन्म जुल गनं वल, हानं गथे दत, गथे मन्त । जिगु
जिगु घाल यंके दुगु छु मखु, गथे जिगु । पर्चीवया पर्चीवनेगु
मित धाल मंगु शरणे वनेगु, जन्म जुल गन चोनेगु । हानं
निर्वाणपद धैगु गथे खै, सुनां कनीगु, छुः ज्ञाने चोना
निर्वाणपद दैगु । सुख दुःख धैगु गनंवल । पशु पंछि गथे
जुल । देव, दैत्य, मनुष्यया भेदभाव सुनां यातखै । अनेक
जलजन्तु कीटादिपिं गथे उत्पत्ति जुल, ध्व फुक स्वीगु अधिन
खै । सृष्टियायिहज्जा ब्रह्मा धाल, थजापिनं वरावर फेरे जुया
वनीगु, थुपिनं सिना वनीगु घास्यंली ध्व ज्ञान अवश्यनं
सीकेमागु खः । ह्विथं तृष्णाजक्याना, अनित्य लोमंका,
थः बुढाजूगु मचायेका ध्व खप्रसमानगु भूठा संसारे चाउला
सुख दुःखया भ्रमरे लाका गुलिचोने । आः जि थुलिजूसानं
लुमंकेफुगु बखते सिनावंसा असल ज्वी, यदि जि वृद्धावस्थानं
जुल, सिना वनीन । दीपङ्करबुद्धभगवान् छक दर्शन यावने

माल धका मतीतया, रात्रीया त्रिप्रहरे पिढावना, यःगु
नित्य धेत्य चाउला (गन्धमादन) पर्वते त्रिरत्न शरणा
धका हाहां थयंकःवन, सुथेनं जुल ।

उगु बखते दीपङ्कर बुद्ध भगवान् यः मुख्यस्य शिष्य
अनन्त प्रतिमान बोधिसत्त्व प्रमूखं मेपि न्यासस्य शिष्यपि
मुंका धर्मोपदेश कना विज्याना चोन । उजोगु बखते थ्व
कान्तिमति थुः अन हे थयन, भगवान् खने साथ शंखनादं
त्रिरत्न शरणा धका नामोच्चारणयाना, शिरकोछुना छरुवे
सुमुकं चोनाचोन ।

वृषनिमित्तं ज्ञात्वा तस्मिन् क्षणे भगवान्

किञ्चित् हसन्नुवाच ।

थुगु बखते थ्व वृषयागु निमित्त भविष्य कालया ज्ञान
संपूर्णसीका, दीपङ्कर भगवान् वाखनेदेक मुसुहुंनं हिला
आज्ञादेका विज्यात । हे बोधिसत्त्वादि मिच्छुगखपि ! हु
वःह्य वृष छह्य छुयावःह्य थनवल सो, छिपि वना वैत वोनाहति
विस्तार यायेमते ।

शिष्यपिसं यदि संदेहयाना प्रभयात । भगवान् ! छलपोल
बिनाकारणं हिलीह्य मखु, छु कारणे वाखनेदेक फिसिक
हिला विज्याना ? ॥ ॥ भगवान् गुरुं उत्तर बिया विज्यात ।

द्विमिसं गथेमसिल । जि द्विलागु कारण दु खः, जि कने
हुं वल्ल द्वँह सामान्य द्वँह मसुः सीकि, भविष्य काले
(द्वापरान्ते) कलिया समये मनुष्यते पापयायेगु जक
चित्तोत्पत्ति जुयात्रै, बुद्धयात हेला यायि, बुद्धया नामोच्चारण
यायिपिं दैमसु, धर्म शास्त्रयात अश्रद्धामयायि, सकलम्लेच्छ
धर्मेस प्रमत्त जुया, हीनयाने लुब्ध जुया, तीर्थिकमतान्तर
नास्तिकयाने रुचियाना ज्वी । थःथे थमं दुःखया मार्गस
पलाछिता, धर्मया मार्ग धर्मया रूल छुं हे हम्मसीका अन्धा
जु ।, देव द्रोही, शास्त्र द्रोही, गुरु द्रोही, मातृ द्रोही,
पितृ द्रोही थय पञ्च महाअबोर पापयाना । नयेगु, तोनेगु,
बांलाक पुनेगु, घनेगु थुलिजक्याना, पशु तुय कर्म
भोगयाना, सज्ज्ञान सन्मार्ग तोता, कुज्ञान कुमार्गस भुले जुया,
राक्षस दैत्यसमानं ला नेगु, मद्ययान यायेगु, स्तमोगुण
प्रधान ज्वीगु धाक भक्षयाना, थव त्यो, थव मत्यो धैगु
छुं हे हम्मसीका, मिं पूह्थ्ये पापं दाह ज्वीका ।

दुःखमेवाभिधावन्ति पथिस्व सुखं

शत्रुवत् घ्नन्ति नराः ।

जन्म जन्मस महा दुःख भोग नयेमालीगु लेनक
व्वां व्वांजुया, सुख ज्वीगु थः मोक्ष वनेदैगु ज्ञानयात शत्रु

भावयाना, मनुष्यगणपि आपा म्वायेदं गु मदेका, याकनं
याकनंसिना नरक भोगयाना ज्वी । यःथे यमं दुःख ज्वीगु
लें व्वा व्वांवना, मनुष्यगणपि जि दुःख जुल धका हाला ज्वी ।

थुजोगु कलिया समये थ्व हे दुँवल्ह (वृष) कान्तिमति
रत्नमय थुः उगुबखते सकलया गुरुजुया, सकलयात बोधिज्ञान
कनीह स्थनीहजुया, श्रावकयानचर्य, प्रत्येकयानचर्य, महा
यानचर्य, वज्रयानचर्य थमंनंयाना धर्मोपदेशनं बिया
विज्यायिह, शक्यमुनि महा मुनीन्द्र, महा बुद्ध धायेका
जन्म जुयि । वं चतुर्मार जितेयाना तथागत पदलाना
निर्वाणचक्र वनी । थजाह बोधिसत्व थौं दुँहचा जन्मकया
थनवल । उंीं जि हिलागु खः ॥ ॥ थवल्ह न्यना सकलया
चिमिस व्वहं जायेका अहो ! आश्चर्य धंन्य धंन्य धका
म्ये वांन्याना, थ्व वृषयात सकसिनं नमस्कारयाना, प्यह
भिक्षुपिसं तीजक ख्यानाहया दीपंकर भगवाया अग्रस तेहल ।

थ्व वृषं भगवान्या पादुकास भोपुया छखे अलगं
चोन । वसपोलं आशीषयाना विज्यात । हे रत्नमय कान्तिमति
वृष ! छं छुं हे धन्दा कायेम्वा । लिपा कलियुगस शक्य कुले
जन्मकया, शक्यमुनि, धायेका चतुर्मार जितेयाना, भगवान्
सम्यक्सं बुद्ध ज्वीह छखः, निरन्तर त्रिरत्न मक्तियानाजु
छन्त सकसिनं महा गुरु धका पूजाया वयि । सुंकर चोनेमते

चर्ये क्षितायंकी, निर्वाणपद लाना महा मोक्ष धैगु अकनिष्ठा
सुखमय भुवने वनीह्म छ ज्वीतिनि, छं कन्याण महा मंगल
ज्वी, छुं हे धन्दा कायेम्वा । थुलि आज्ञाजूगु शुभाशीष न्यना
हर्षया खोबि वयेका (तथाऽस्तु) धका शिरस फया, धौछि
अनसन्तुं वासयाना, लिषा अनंदना मेगु पवेंतस वन ।

जब ववं रात्रिजुल, तःमागु वंगल सिमाकसं वासयाना
चोन । शुद्ध अर्द्ध रात्रिया प्रहरे अकस्मात् धुं, भालु, बनेल
इत्यादि वन जन्तुपिं वया दुःख व्यूवल । थथे जुस्येलि
जि थौं अवस्यनं सीन धका सीका, दीपङ्कर बुद्ध भगवानं
आज्ञाजूगु खं लुमंका, वंगल सिमाके चोना, तपंपूर्ण ज्वीका,
जिगु लाहि नःवपिं थ्व वन जन्तुतेत त्याका, याकनं निर्वाणपद
लायेफेमा धका स्मरणयाना । नमो बुद्धाय, नमो धर्माय,
नमः संघाय, हे त्रिरत्न प्रभू शरण, मां तारयेति थथे
धका नामकया चोन ।

वन जन्तुपिसं दुःख व्यूगु असह्य वेदना जुया तत्कारणं
कान्तिमति स वृषः क्षणे पञ्चत्वमुपगतं च ।

थ्व कान्तिममि वृष उगुबखते (देहान्त) मृत्यु जुल ।
वन जन्तुते लाहि नया थःथगु थासे वन ।

थ्व दोहया लाहि पशु व पंछि जम्मा ५०० न्यासह
सिगु म्हुतुस लात ।

तस्मिन्नवसरेविप्र मार्गे मार्गेश्वरम् रुदन् ।

प्राप्तं तत्रैव शृङ्गौ च ददर्श चाष्टिपंजरं ॥

उगुबखते ब्राह्मण जि कान्तिमति रत्नमय वृष (वृः)
(कुत्रगतेति) गनवन, गुथाय वन धका उग्ये धुग्ये नुम
मलिका माःजुल । मार्ग मार्गपति रत्न रत्नं अमखयाना जुजुं
दैवसंयोग प्यन्हुदेका अनहे ध्यन, केहि दुर्गेन्ध नवया चोन ।
कैया द्वैखना विचारयाना सोबले निकू निपुनं खन ।

ध्व ब्राह्मणसीका लाहानिपां व्व व्व स्याना जि दैव
फुत धाधां खोया, विलापयाना धाल— अहो ! हेदैव
कान्तिमति वृष ! थन गथेलावल, हे वृष ! गुजोगु आश्चर्य जुल,
थन वनान्तरे वया गथे देहान्त जूवल । थन वन जन्तुतेसं गथे
दुःख बिया स्यात ज्वी, थमं गुजोगु कष्ट नया मृत्युजुल ज्वी,
जिं खंगु मखु । आ छुयाये कर्मयागु भोग खः धका थःथमं
धीरयाना, भसुकाततं के कुकं नदीतीरे मनोरम स्यानेयंका
व केदकं गर्भसतया फीतोपुया, फियागु चैत्य देकल । जःगु
निकू छपु (चूडामणि) गजूयाना, खःगु निकूति तीर्थया
लंख तुयादया, अर्ष बिया, पूजायाना वारंवार चैत्य
प्रदक्षिणायाना, ललितकं अनहे वासयाना, कान्तिमति वृष
दुर्गति मवनेमा सुगतिप्राप्त ज्वीमा धका भिणु आशिकायाना,
ध्व ब्राह्मण नित्य आर्य्य वामसंगीति गथ्य बोना चोन ।

त्रिंशत्स्येक दिने प्रातः रत्नचैत्यमभूत्तदा ।

नीलरत्न वृषाकारं शृंगोऽपि प्राभवत्क्षणे ॥

यदि ३१ दिन खुन्हु सुथसिया प्रहरे थ्व वालुका चैत्य अकस्मात् रत्नया चैत्य जुया वल, वाकिदुगु खःगु न्यकू छपुनं दैवानुभाव (आकाश वर्ण) वचुगु नील रत्नया वृषाकार ढँहचाध्ये आकार जुया पञ्चरम्मि प्याहाँ वया चोन । रत्न वृष्टिनं जुल, पृथिवीनं कंप जुल, थथे आश्चर्यादिभुत जूगु खना, ब्राह्मण ग्याना, काचाकाचां चैत्य भोपुया (त्रिरत्न शरण, नामसंगीति शरण, स्वयंभू शरण) धका हाला नीलथुः वृषाकार महा रत्न न्यकू छपु ज्वना दीपङ्कर भगवान् बुद्धया थाम वना पादकमले भोःपुया थ्वहे नीलथुः वृषाकार चढेयाना ब्राह्मणं वृत्तान्त खँ विन्तियात । अनचोंपिं सकलें अद्भुताश्चर्य जीका चोन । दीपङ्कर भगवानं खँ फुकं थ्वीका, थःगु आश्रमं दना, अनहे रत्न चैत्यया थासे शिष्यपिं फुकंछुंका विज्यात । क्रमपूर्वकं सकसिनं प्रदक्षिणायानालि छचारख्यलं चोना विन्तियाना चोन । दीपङ्कर भगवान् अनहे विज्याना धर्मोपदेश बिया विज्यात । यदि आश्विन शुक्लया पुह्री १ आश्विनी नक्षत्र २, आदित्य वार ३, हर्षण योग ४, सँन्हू ५ थ्व न्यागु जोग मिलेजूगु दिनस थ्व नीलरत्न वृषाकार अनहे चैत्यया अग्रेतया, दीपङ्कर बुद्ध भगवानं नील वृषभ

रत्नमय मन्त्र प्रयोगयाना (प्राणज्जल्य) वैगु मन्त्रं प्राणप्रतिष्ठा दशकर्म दशाभिपेक बिया, वचनंथिया (नील महा वृष रत्न बोधिसत्त्व) धका नामाभिपेक नाम क्षुना विज्यात । अनंनिसें लोके (नील थुः) धका प्रग्य्यान जुल । दल्लि छक आश्विन शुक्ला पुद्दी खुन्दु मंगलोत्सव जात्रा यापिगु थितिनं जुल ।

एवं विपश्चि भगवान् आदि बुद्धपिसं वहे दिने मंगलोत्सव जात्रायाना इयावं चीन । यद्यपि क्रमशः हानं शाक्यमुनि बुद्धया पर्याय थ्यन थ्वहे खं थःगु जन्म चरित्रं लुभंका सकल शिष्यगणपिन्त कना (नील वृष रत्न बोधिसत्त्व) स्वरूप मूर्तिकयना मंगलोत्सव ह्यापाथ्ये जात्रायाना, सकलयात्त चित्त बुभंज्वीक नील वृषयागु वृत्तान्त खं कना विज्यात ।

श्री गुरु दीपङ्करबुद्ध भगवानं प्राणप्रतिष्ठा नामाभिपेकयाना विज्यागु दिन थ्वहे खः धका लिपा भी शाक्यमुनि बुद्ध भगवानं अनाथपिण्डक धयात्त महाजन सार्थवाहया आरामे विज्याना, आनन्दादि भिक्षु प्रभृति सकल मुंका आज्ञादेका विज्यात ।

(प्रमाण)

आश्विनी पूर्णिमाशुक्ले हयर्क्षरविवासरे ।
आयुष्मतीयुती योगे संक्रान्ति पर्वसंयुतेः ॥

१. गुलिं जोतीषाचार्यपिसं संखायायि, हर्षणयोगेत्यर्थः थये टीका बिया तल ।

अहोरात्राख्य यत्पूर्वं विपश्चिना प्रभाशितम् ।
 बुद्धदेवालयेतीर्थे सर्वान्देवान् प्रपूजयेत् ॥
 प्रदक्षिणं सहस्रं च यावत्कुर्यात्प्रमोदयः ।
 पदेपदे सुवर्णैक कर्षदान फलंलभेत् ॥
 निर्घोषदमनो नाम देवाऽसुर प्रमोदकः ।
 तेनाऽसुरेणाऽहोरात्रं व्रतंसंचरितुं क्रमात् ॥
 रात्रौ दिवा सुसंपूर्णमहोरात्र व्रतंचरेत् ।
 तारास्मरणघोषं वै अभवत् यत्तदद्भुतम् ॥

अर्थः

आश्विन शुक्लया पुह्री १, रेवती फुकां अश्विनी नक्षत्र
 २, हर्षणयोग ३, आदित्य वार ४, सँन्हू ५ थुलि न्यागु
 बोगमिले ज्वीवले अथवा दिने अहोरात्र व्रत चोने,
 चैत्य थाये, भगवान् बुद्ध देवालये सहस्र प्रदक्षिणायाये,
 श्रद्धा पूर्वकं दानयाये, तीर्थ स्नान कर्मयाये, लें लार्पि देवतादि
 पिन्व पूजादि कर्मनयाये, हिंसादि कुकर्मयाये मज्यू ।
 शील व्रतसं चोने माल । थव (नील वृष) तेष मूर्तिषात
 मंगलोत्सव जात्रायाना पूजायाये, सकल प्राणितेगु
 नवग्रहारिष्ट निवारणयायेत १८ वृही चढेयाये अथवा दानयाये,

हे त्रिरत्न ! छलपोलया शरण, हे तारिणि ! मां तारयेति, याकनं संसार रूपी समुद्रं जित तरेयाना पिज्याहुँ । थथे नामोच्चारण याना पलाळिये माल । अले छालाळिनाया सुवर्ण ? तोला दान यानागु पुण्यमिले ज्वी । सुखावती वासनं मिलेज्वी, थजागु ज्ञान हसीका, ह्यापा स्वर्गया ईन्द्रादि देवतापि, पातालया निर्द्योषदमनादि दैत्यपि वया, प्राचीनविधिं थ्व रत्नमय नील वृष देव मूर्तियात पूजादि व प्रणामयाना, जय मंग-लोत्सव दान प्रदानयाना, प्रदक्षिणायाना वन । थुगु पुण्यं सुखावती सुखयदमिले जुल । थ्व खँ न्यना सकल शिष्यपि प्रमोदचित्तयानां चोन ।

उगुबखते हानं शाक्यमुनि भगवानं आज्ञादयेकल, थ्वखँ जिगु जन्म चरित्र खः सकसिनं सीकी । गथे धालसा-केवल पूर्व जन्मस व कान्तिमति द्वँहचा जिहे खः । वैगु खगु न्यकू नील रत्नमय वृषाकार (नीलथुः) नं जिहे खः ।

व द्वँहचा लहिनातह विद्वान् ब्राह्मण शुद्धोदन राजा जि अबु जुया जन्म कावल । ब्राह्मणी मायादेवी जि मां जुया जन्म कावल । व द्वँहचिया मां गोमाता गौतमी रानी जि चिधि मां जुया जन्म कावल । ह्यापाया जन्मस मां मखेकं थुगु जन्मस चिधि मां जूवै मखु पका । जित थुगु जन्मस जन्मयाह मां मायादेवी खः । जित पालन

पोषण्याल्ल गौतमी पैल्ल चिधि मां खः । द्वँहचा जन्मस
सा जुया जन्म कावल् जि मां हे खः ।

उकीं थुगु जन्मस जित गुलितक्क विचारयात्त सो
गौतमी जि चिधि मां (वैमाता) धंन्य धंन्य ।

वृष जन्मस जि अब्बु द्वँहचा थुगु जन्मस दण्डपाणि
राजा जि ससअब्बु जुया जन्म कावल् ।

हानं वृष जन्मस वनान्तरे संभोग जूह्व सा थुगु
जन्मस यशोधरादेवी जि स्त्री जुया जन्म कावल् ।

जि ह्वापा वृष जन्मस जित दाया ख्याना यंकीपीं
गोथलात्त सोह्व दु । थुपिं सोह्व थुगु जन्मस देवदत्त,
सुनन्द, आनन्द जि किजापिं जुया जन्म कावल् । जि
वृष जन्मस गन्धमादन पर्वते कान्तिमत्ति थुः तीजक्क ख्याना
दीपङ्कर भगवानया अग्रस तेयंकूपिं प्यल्ल मिच्चुत्त थुगु
जन्मस शालिपुत्र, महामौङ्गल्यायण, आनन्द, काश्यप
मिच्चु जुया जन्म कावल् ।

हानं वृष जन्मस वनान्तरे जित स्याना लाहि नःपिं
पशु व पंछित जम्मा न्यास दुः थ्व ५०० फुकं थुगु
जन्मस मारया पुत्रादि सैन्य सिपाहि जुया जन्म कावल् ।
थ्व फुक मारया गणयात्त त्याका, तथागत भगवान् बुद्ध
धायेका चोनेदत्त, कारण जि द्वँहचा जुया जन्म कयावले

छुम्वाकं दीपङ्कर भगवान् दर्शनयाना वयास्य त्रित म्याना
जिगु लाहि नया वंषि फुकं थुगु जन्मस मारयागण वक्र
सीकि ॥ ॥ थ्व खँ न्यना अनर्चोपि सकलया मनबोध
जुपा हे शाक्यमुने ! भो भगवान् ! छलपोल वंन्य वंन्य
खः धका यथाक्रमं दना सकसिनं भगवान् बुद्धया पालिस
बन्दनायाना खचा चाउला थःथ छे लिहाँवन । भगवान्
बुद्धनं अनं प्रस्थानयाना मेगु स्थाने शिष्यगणपि सहितयाना
विज्यात ।

थ्व खँ तःधंगु महावस्तु अवदाने दु । मंगल यायेगु
प्रमाण चैत्य पुंगवावदानेनं दु । कपिसावदानेनं दु । तःधंगु
चित्रविंशति अवदानेनं दु । हानं अशोकावदानेनं दु ।
व्रतावदानेनं दु । अज मेमेगुलिनं दैतिनि, छद्मसें मसिल
घायेवंतुं सकसिनं मसीगु मखु । थुलि मछि बौद्धावदाने
कनावंगु प्रमाण दु । सकसिनं सीकेमागु अवश्य खः ।
(किन्तु) वालार्क टीकास धयातगु दु कि सामर
'समुद्र' या न्योनेसं चोना लःतोने पेचाल धका खोया
चोन धाःध्ये, अथे छाप् भीत समुद्र न्योने दु । लःया
तृष्णां दुःख ज्वी मागु मदु । सोया विज्याहुँ । हानं थ्वहे
खँ यदि वंशावलिनं प्रशस्त खँ दु ।

केहि कालान्तरे श्री शाक्यमुनि बुद्ध भगवान् निर्वाण

ज्वी धुस्यंलि थ्व रत्नमय नील थुः वृषाकरपात तःधंगु
महा रत्न खः धका सीका, सकसिनं लोभयात, थ्व रत्न
खुँतेसं छन्दु खुयायंकी धका ततःधंपिं विद्वान् महाजन-
पिसं थ्व रत्न गोप्यगु थासे तयेमाज धका नेपाले हल,
पिंगल महा विहारे (चाय्बहिली विहारे) तेहल ।

अननं गुलि चोन ज्वी, खुँतेसं असंख्य दुःखविल ।
खुयानं यंकल, तर खुँतसें पचेयाये मफु, अनसंतुं तेहल ।
लिपा छन्दु थ्वहे नील थुः वृष देवतां नोवाना बिज्यात ।
वहे खँ सकारयाना, लालापिं वयेमज्यूगु, स्वयेमज्यूगु
योगाम्बर भैगु ललितपुर हिरंग्यवर्ण महाविहारे गुह्यच-
क्रस्थले तेयंके माल धका बुद्धिमान्पिसं थ्व रत्न नील
थुः वृष देवता इया अन तेहल । अनं लिपातिनि कामाजु
बिज्यागु, लिपा यंवाहा धका नाम प्रचार जुल, गुखुन्दु
थ्व रत्न नील थुः वृष देवता अन तेहल । अर्थात् योगाम्बर
सलावल । उखुन्हुं निसें पूजादि कर्म विधि ज्वीवले,
नेगु तोनेगु भोजनादि क्रियास आपाज्वरे यायेम्वाल ।
सलंसः मनुत सःता लुं पूजा भावयाना भोजन ज्वीवले
भतीचा नक ज्वरेयाना सकसितनं नकेसिधेका हानं थले
सोसा थल पति पूर्ण पूर्ण जुयाहे चोनी, कारण थ्वहे
नील थुः रत्न वृष देवताया प्रभावं खः । उकीं अनहे

सकलें वया भ्वेन्यायेकः त्रैगु चलन सुज । यथे जुजुं
गुलिं कालविते जुल, दैवयोग छन्दु विनाश जी त्यल ।
(वाराणसी) धैगु काशिदेशे छद्म विधवा ब्राह्मणीया
महादेवया बीजं जन्म जूद्ध शंकराचार्य छद्म दु । श्वया
गुरु दत्तातु ऋषि खः । श्व शंकराचार्य लिपा व्याख्या
जुस्यंलि नास्तिकया माहा गुरु जुया मानौ दानामुर वैद्य
दैत्य समान अभिमानं पूर्णं ज्वीका, अनेक जातीय
शिष्यगणपिं समेतं मुंका, भारत खण्डे (बौद्ध शास्त्र)
आपालं विनाशयाव, स्वयंभू चैत्य बुद्ध देवालय, बुद्ध
मूर्ति गन गन दु, अन अन वना ध्वंशयाना, शिव लिंग
स्थापनायाना बल । भारत देशे आपालं स्यंके धुस्यंलि
नेपाल देशेनं शंकराचार्य श्यंक बल ।

ह्वापां खोप देशे ह्रैदतक चोना थः गुरु दत्तातु
ऋषिया मूर्ति छद्मनं थापनायाना, बौद्ध शास्त्र विध्वंसयात ।
उकीं खोप देशे थौंया अद्यापितकं बौद्ध हीन जुया चोन ।

अनंलि लिपा हानं ललितपट्टन यलेवल, बौद्ध
शास्त्र स्यंकः जुल । उगुवलते श्व शंकराचार्य पापी
नास्तिकयागु खाजकहे सोये मत्यो धैगु विचारयाना, यल
ख्वप, सको, किपू, फंपि इत्यादि देशे चोंपिं, सःपिं
आचार्य महा परिडतगणपिं मुना, ततःधंगु सफूत ज्वना,

नागार्जुन पर्वते पुरश्चरण विधिया वन । उगुबखते नेपालया
शिरोमणि षट्शास्त्री महा पाण्डित्य गुरु अमरसिंहाचार्य
लिसे शास्त्रार्थ जुल, शंकराचार्य वीत थिक जुल ।

अमर सिंहाचार्य थःहे पुत्रीं मखुथ्येयाना व्युगुलिं अमर
सिंहाचार्य तच्चकं सरम ज्वीका पुस्तकालये द्रहँ वंछ थौंया
अद्यापितकं प्याहाँ विमज्यानि ।

लिपा हानं किजाह्म दुह सिंहाचार्य लिसे शास्त्रार्थ जुल,
शंकराचार्य बुत । सोन्हुतक दुहसिंहाचार्य कुनातल, अमर
सिंहाचार्यया पुत्रीं कुनातःह पिकयाबिल । दुह सिंहाचार्य
गुरुयात शंकराचार्य कुबिद्यां प्रहारयात, दुह सिंहाचार्य शूलया
रोगं अकस्मात् मृत्यु जुल । वैके दक्क बुद्ध शास्त्र मीतया
भस्मयात । अमर सिंहाचार्य देकुगु संस्कृतया धुकू
थःगुहे नाम कोकया देकातःगु (अमर कोश) धैगु
पुस्तक १३ अध्याय दुगु पुस्तक प्रकाश यायेमानीगु प्रचार
यायेमलानिगु थ्व अमरकोश थ्व शंकराचार्य थमं
चोनिसें बोर्बो धमाधम खुना मीतया भस्मयात ।

भिगु काण्डस्येके धुस्येलि लिपा थुगु श्लोक खन ।

शंभूरीशः पशुपतिः शिवःशूली महेश्वरः ।

थ्व श्लोक खस्येलि जि अबु महादेवयागु नाम स्यंके

मज्जू धका मस्यंकुसे न्यंकुगु थौया अद्यापितकं (अमर कोश) तृतीय काण्ड बाकीहे दनि ।

थ्व महा पापी अहंकारि शंकराचार्य अत्याचार यागु सुनानं सोयेमफया, काछें वालकौमारी देवी कोपे जुया बिज्यात । प्यह्य विद्वान् आचार्यपिं वना पुरश्चरण चोना, भोल गणेश स्थापनायाना, योग चोना बिज्यात । शंकराचार्य सीत थिक जुल । उगुबखतेनं अमरसिंहाचार्यया पुत्रीयागु उपदेशं शंकराचार्य बिस्थुंवन । कयपुलि मेमेगु गामे गामे चाउला दछि दस्यंलि हानं थन यल्लेहेनंतुं गोप्ययाना द्रहो वल । लिपा मौका सोया गोप्य पूर्वकं थन योगाम्बर गुह्यालये वया विधिविधानं पूजायावल । भोजनादि क्रियाजुल, अनंलि प्राचीन विधिथ्ये शेषवलि धैगु उर्द्धभाग देवभाग १, अधोभाग भूतप्रेतादिभाग २, इमित सन्तोष यायेगु विधि (कलंछोयेगु) ज्या जुल । वनेमाल गन ? पशुपति थ्यंक, शंकराचार्य थ्वहे रत्नमय वृष देवता छल्लनं सुनानं मखंक कथा वातास दुनेतया लपसें तोपुया कलंवाये धका पशुपतिस यंकल, सोयानं होस मदु । लिपा कहे कंस पश्चातापयाना चोन ।

सकल वना काःवन वियामह, शंकराचार्ययागु ख्येलं पशुपति गोप्ययाना तयातल । थन चोपिं सोधू संभवना काःवन अथेनं वियामह । सुनानं कथाहये मफु । थ्व नील थुः

रत्नमय वृष देवता किहाँवनी धका थासेथासे दिग् विदिग्स
शंकराचार्य ताडनतया दिग् बन्धनयाना तल । थ्व नील थुः
देवता अन चोनेमंमदु, वयेतःसनी तर वयेमफु ।

थुलि जुस्येंलि अहंकारि शंकराचार्य (जेदेशे वन)
सःसःपिं आचार्यगणपिं नागार्जुन पर्वते, फुल्लोच्च पर्वते, पुरश्चरण
चोंवना चोन । उगु मौकास शंकराचार्य बौद्ध शास्त्र स्यंके
फक्क स्यंकल, लिपा थ्व पापीया शरीर दाह जुया चोनां चोने
मफयावल्ल । विद्याधरी देवी कोपेजुया थ्व बुद्ध ध्वंशक
नास्तिक सीत थीक जुल ।

अननं अमर सिंहाचार्यया पुत्रीं विस्युहुँ चोनेमते धका
उपदेश विल । थ्वीगु वचन शिरोपरयाना जेदेशे दछि जक
चोनेफत, अनं सकोदेशे विस्युंवन । लिपा प्यह्म आचार्यपिं
वना विद्याधरी देवी पूजायाना शान्तयात ।

अनंलि सकोदेशेनं थ्व शंकराचार्य बौद्ध शास्त्र छिन्न
भिन्नयाना चैत्यनं स्यंका जुल । च्यान्हु दुखुन्हु श्री उग्रतारा
देवीया थाय्वना स्यंके धका च्वेथाहावन, तःगोगु चैत्य
छग खन । थ्वहे चैत्य मन्त्रं फाताप्बीका बील, थ्व चैत्य
थौंया अद्यापितकं दनि । थ्वहे पापं शंकराचार्यया लः तोनेगु
प्यासं दाह जुया सनेमफुत । जवे खवे पर्वतं लः कहाँवगु
अब्द तायेदु, सोवंसा लः गनं खनेमदु । तिन्वेवया मरणान्त

सीतनं थिक जुल, लिपा शाम्यञ्जुस्यंलि एकचिन्नं श्री उग्रतारा
देवीयात स्तुतियाना भक्तियास्यंलि सनेफत । वसपोळं
आकाशवाणीं आज्ञाजुल ।

चाण्डाल हिंसक दुष्ट पापी त्वं बुद्धध्वंसक ।
असह्यवेदना तेऽपि महादुःखो भविष्यति ॥

हे चाण्डाल, हिंसक, महापापी, दुष्ट, बुद्ध ध्वंसयाना
ज्वीह्व काँ, महा मूर्ख ! छं सहयानां सहयाये फँमस्तुगु महा
दुःख शंकष्ट वेदना नया भोग यायिह्व छ ज्वीन । जित
स्तुतियागु प्रभावं लः तोने दै, तर छ थन जोनाचोन घाःसा
छ अवश्यनं मृत्यु ज्वी, उकीं याकनं दनाहुँ । थथे आकाश
वाणीजूगु सँ न्यना, ब्राहिमानं ग्याना कहाँ वल, भैरव
पूजायाना, लःनं तोना, काचाकाचां सकोदेशं प्याहाँवना थ्व
पापी शंकराचार्य इतासनं (ताम्रद्वीपे) वन । हाकुमन थ्व
पापी अन प्यन्हु हे चोनेमफु । अनं हानं उत्तर सोयः
हासा (सिंहलद्वीपे) वन । ब्रह्मपुत्र नदी तीरे थ्यसँलि
वासं चोन ॥ ॥ थुगु समये भी उग्रतारा योगिनी
देवीनं हासा देशया मालीक लामाजुयात रात्रिस स्वमे
दर्शन बिया, माक सँ कना, भरोसा बिया आज्ञा जुल ।

हे भक्त ! छ शिष्य खः, छन्त अष्टसिद्धिवर बियातयागु

दुः, छ ग्यायेम्वा । थन हासादेशे छ थौं मालीक खः, छन्तनं थव देशनं विध्वंसयाना छोये धका महा पापी दुष्ट बुद्ध ध्वंसाचार्य नास्तिक छह वल । छं गथे मसिल ब्रह्मपुत्र नदी तीरे थयने धुकल, थव पापी शंकराचार्य भारते वाराणसी काशीदेशे विधवा ब्राह्मणीया गर्भ शिवया बीजं जातजूह खः ।

थव अहंकारी जुया यमलोक वने माली धैगु छुं ज्ञान मदुल्ल जुया (भारतेनं) अथवा नेपालेनं बुद्ध शास्त्र चैत्य, बुद्धया मूर्ति, देवालय स्यंकेफक स्यंका छिन्न भिन्नयाना आः हानं थननं नष्टभ्रष्टयाये धका वल, छ सुंक चोनेमते ।

नेपाले देशे छयासिनं आपालं सःपिं विद्वान्त यकं दु, पुरुषार्थ दुपिं आचार्यगणपिनं यकं दु ।

(किन्तु) अजापिं धाक थव पापी नास्तिक बुद्ध ध्वंसकयागु ख्वा जकहे स्वये मल्लुः थवीगु ख्वाहे स्वये मल्लो धका वनान्तरे वना पुरश्चरण च्ववन । थवयात भन् असल जुल, छनं अथेयाये व भन् थवयात सुगन्ध ज्वी, छ गनं वनेमते जि दु । छं छुं धन्दा कायेम्वा इत्यादि माक भरोसा बिया अन्तर ध्यान जुया विज्यात ।

लामाजुया न्ह्यलंचाल बाथाक दना पूजा कोथाय् द्वाँवना सुगन्ध धूप थना, दीप च्याका, भावयाना

स्तोत्रयाना विन्तियात ।

हे जगज्जननि ! भो देवी ! हे माता ! हे तारिणि !
धन्य धन्य स्वप्नस दर्शन जुल, वध्यें आःनं दर्शन फोने
धका भोःसुना विन्तियात ।

वसपोलं हानं दर्शन बिया आज्ञाजुल । हे शिष्य ! छ
जि छल्ल भंक्त स्वः, छं धन्दा कायेम्वा हूँ । नेपालेनं तःधंछ
पद्शास्त्री अमरसिंहाचार्य थ्व शंकराचार्य धैल्ल शिवया पुत्र
स्वः, थ्वं महादेवयाके वरदान कया बल्ल धका सीका
ऋद्धिवलं शास्त्रार्थयाना थ्व महा पापी दुष्टयात तेभखु
धका संगुस्वः, छुयाये वयाहे म्हाय्मं स्वंका बिल । उकीं
छन्तनं अथे जी, सुनानं सीके मते, व पापी थन द्वाँ
मववं छयाकनं अनहे हूँ धका आज्ञा जुया अन्तर ध्यान
जुया विज्यात ।

लामाजुं तथाऽस्तु धका शिरसफया दण्डवत् प्रणामयाना,
सुनानं मखंक प्याहाँ वना, शंकराचार्यया मोल्हुया जाथुया
चोंगु बखते ब्रह्मपुत्र नदी तीरे थ्यंक वन । विचारयाना सोत
हूँ केता छपुंचिना जाथुया चोंल्ल शंकराचार्य वहे स्वः धका
सीका, लामाजुं वसपोल माता स्मरणयाना आज्ञा जुल ।

थःसु रूयें ? धका नोतुल, शंकराचार्य नोंमवा । हानं
धाल, नोंमवा, सोकः संम नोतुलनं शंकराचार्य नोंमवा ।

प्यकःगुलि लामाजुं छं म्हुतु मदुला, छ लाता
पाकजा मखु ध्येचों अथवा छ ख्वाँय् लाकि गथे धाल ।

थ्व खँ न्यना शंकराचार्य कोपे जुया बाह्यखँ पिकया
जवाफ बिल । जि ख्वाँय् नं मखु, लाता पाकनं मखु । जि
चतुर्वेद धरेयाना चोनाह्म शिवपुत्र ब्राह्मण खः, जि जा
थुयेवले नोंवाये मज्यू, खँ हायेनं मज्यू, सुंथियेनं मज्यू ।
उकीं सुमुक चोना चोनागु खः । छसु खः ? गन वने धका
वयागु, अनहे हुँ, थन चोने मते, छंके दुर्गन्ध दु, याकनं
हुँ धका धागु न्यना लामाजुं धाल ।

छं धागु खँ मिलेमजुल गथे ? लं तोता, यदि वस्त्र तोता
जाथुये मास्येलि केतानं वस्त्र खः, केता जक गुलि चोखागु,
वस्त्र जक गुलि अचोखागु, छमा वस्त्र अचोखा केता चोखाह्म
जुलनि, छेने थीवले हासिलेमा, केता थीवले हासिले म्वा
धायिह्म छ जुल ।

जित दुर्गन्ध दुह्म थन चोनेमते हुँ धाल । जिकेजा
मल मूत्र छुंहे मदु, छंके प्वाथे दुने मल मूत्र यको दु ।
उकीं छहे नवोगु खः, जि नवोगु मखु । छ थःके खिचो
घाना नवेका ज्वाह्मसे परयात दुर्गन्ध धायिह्म छहे नवोगु
खः थन चोनेमते याकनं हुँ ।

छं पिनेजक शुद्ध दुनेजा ह्यंग्वासमानं हाकुह्म । जि

पिने खिति दुसानं दुने तोयू षका वरावर खँ जुजुं चित्तयागु
प्रभोत्तर केवल शास्त्रार्थ जुल ।

लिपा लामाजुं ऋद्विवलं शास्त्रार्थयात, जिगु प्वाथे
दुने वा छंगु प्वाथे दुने खिचो दु मदु सोयेगु, सुनवयि
खेका वा धका लामाजुं थःगु प्वा थमं फाया कयन, दुनेजा
स्फटिक थ्ये पञ्चरस्मि सहित जुया, अष्ट सुगन्ध वामना
वया चोंगु खन । हानं खि, चो, हि, खै, हि, आतापति,
ला इत्यादि छुंहे खने मदु, तेज नक पिहाँवया चोंगु खन ।

लामाजुया प्वाथे दुने थथे उज्ज्वल तेज खँस्यंलि
शंकराचार्य म्ये वांन्याना तोले जुया चोन ।

अहो आश्चर्य ! ब्रह्मायाजा खिचो दु, थ्वया मल
मूत्र धैगु छुंहे मदु । थ्व सामान्य मनु मखु, थ्व सुज्जी
धका गजि धतुर नःलथ्ये ताउत भुले जुया सोया चोन ।
तदा लामाजुं आज्ञा जुल ।

हे शिवपुत्र ! बुद्ध षंसक ब्राह्मण ! छंगु प्वाथेनं सोये
त्यना खिचो दुलाकि मदु सोयेमाल, सुनवो, सुनखा
अले तिनि प्रत्यक्षरूपं त्या बू सीदै धका धागु खँ न्यना
शंकराचार्यया अथेयाये थथेयाये मदया ब्रह्मिमानं ग्याना
प्वाफाया केनेगु ऋद्विवल समर्थ मदया, वाथाक दना,
थुनां थुनां च्वीक विस्पृंवन, लामाजुं लिनायंकल, खासा

धैगु उच्चपर्वतच्चे थ्यंकःवना, चाः चाउला अन वने थन
वने मदया पर्वते लोहँया कापि होतं द्वहँवना दने (नष्टछाया)
सुनानं मखनीगु विद्यावोना शंकराचार्य दुने सुला चोन ।

लामाजुनं अनच्चे थ्यंकःवना चाउला विचार्याना
सोत । थन दुने दु धका सीका तःगोगु लोहँ छग हया
प्वा तिना बिल, छचा ख्यलं ताडनतया बिल ।

उगुषखते थ्व शंकराचार्य सासः कुना सीत थिक जुल ।
थ्वं खोया अनेक प्रकारं विन्तियाना हल । कोटि कोटि
विन्ति जि बुत खः, सासः कुना सीन जि, जिगु अपराध
क्षमायाना विज्याहुँ, जिं अत्याचार्याना जुया खः । थुगु
छवार माफ फोने धका खोया तःतःसकं विन्ति भावयाना
हम्यंलि लामाजुया करुणा वना, हानं वज्रकीलय जोगं व
पर्वते वज्रं प्वा खना हो छहो तया बिल, लामाजु लिहँ
वन । सासः कुना मृत्यु ज्वीत्यंझ शंकराचार्य वचे जुल,
तर पिहँ वये मफु ।

थौंया अद्यापितकं शंकराचार्य अन पर्वते दुने चोना
दुःख भोगयाना चोन तिनि । ह्यासा वनीपिसं होतं सोया
वःपिनं दनि, यदि आःतकं सोयेगु दनि ।

ह्यासा देशे शंकराचार्य स्यंके मलागुलिं बौद्ध शास्त्र
यकों दनि (भारते) स्यंका वयेधुंकुगुलि बुद्धयान बौद्ध

ग्रन्थ बमलात ।

थन नेपालेनं खोप देशे शंकराचार्य ह्दतक चोना
स्यंका वंगुलि थौतकं खोप देशे बुद्धया चमत्कार बुद्धे
मदु ॥ ॥ थन यलदेशे स्वंदतक चोना वंगुलि यलदेशेनं
बुद्धया महायान वज्रयान बमलात, खालि बाह्ययान जक
आपा जुत्त ॥ ॥ जेदेशे दछिजक चोंगुलि बुद्धया महायान
वज्रयान केही बलानि । सकोदेशे च्यान्हु जक चोंगुलि
अननं बलानि । फंपिदेशे खुला चोना छिन्न भिन्नयाना
वंगुलि थौया अद्यापितकं फंपिदेशे बुद्धालय खनेमदु ।
अन चोंपिके बुद्धया ज्ञान मार्गेनं मदु ।

विशेषं बुद्ध ध्वंसयागु पापं थव शंकराचार्य महापापी
सजीवं अन्धकार महा नरके दुने चोना अद्यापितकं महा दुःख
कष्ट नया चोने माल ।

शंकराचार्यया खं पूर्ण रूपं सीकेत कपिसावदाने
सोयेगु ॥ ॥ उलिजुस्योले नेपालेचोंपि विद्वान् आचार्य
गणपिं सोदतक पुरश्चरण विधियाये धुंका लिहौ वल, योगा-
म्बर दर्शनयाये धका वल, पूजा विधियात, थव नील वृष
देवता छह मद्गु सिया न्यना सोत, वृत्तान्त खं स्थविरपिसं
कन । आचार्यपिसं तवह बिया बिज्यात, यंकूहसैं यंकेधुंकल
मलाका खोया हालां छुयाये, थथे मखुत, प्रयत्नयाना सोये,

धन्दा कायेम्वा धका विचारयाना आचार्य गुरुपिं छेमवंसे
 प्यत्त पुरुषार्थवान् ऋद्धि सिद्धि दुपिं गुरुपिं अनहे चोना
 पुरश्चरण विधिं तन्त्र मन्त्रं नील थुः देवता आकर्षणयात ।
 थुगु समये थ्व नील थुः देवता मन्त्र सिद्धिया जोरं
 पशुपतिस चोने मंमदया ख्व ख्वं लिहाँ वल । तर
 शंकराचार्य दिग् वन्धनयाना ताडन तयातःगुलिं लें लुयेके
 मफु । मखु थास जक लावन ।

थ्व नील थुः खोया खोया पर्वत गगं हानं कहाँववं
 थासे थासे वास चोचों लें वःवले सोलाविते जुल । लें
 विस्तार जूगुलिं लेंलापिं देवतादिपिं थाय् वासयाना वःह्व
 नील थुः देवता योगाम्बर चक्रस्थले बह्व खः । ललितपुर
 योगाम्बरया चक्रस्थले (श्री वसुवर्ण) महाविहारे इतिलंन्ये
 थ्यन । थन थ्यने साथ थ्व बोधिसत्त्व रूप (नील थुः)
 वृष देवता सिद्ध जुल । थौंया अद्यापि थ्व चिंह दया
 चोन तिनि । उकीं थुगु वसुवर्ण महा विहारे सिद्ध जूह्व
 नील थुःया जात्रा (दीपंखा) या महत्व संचित रूपं जक
 चोया जुल ।

थ्व वंगु नेपाली शुभ सम्बत् १०६८ साले आश्विन पुही
 अश्विनी पर रेवती नक्षत्र आदित्यवार सँन्हु हर्षणं योग थ्व न्यागु
 जोग मिले जूगु दिने, वसुवर्ण महा विहारे सिद्ध जुया बिभ्याकक्ष

(वृषावतार) नीलथुः देवतायात विधि पूर्वक सप्रविवानुत्तरं पूजादि कर्म याना, ज्ञानमाला गायन याना, नानाप्रकारं स्तोत्रादि बोना पूजा जुल । प्राचीनविधिं देवतादि प्रदक्षिणा याना, अहोरात्र या थानथानान्तरे भ्रमन याना, मंगलोत्सव जुल । आपालं जनतापि दुगुलिं सरकारं मदत बिल । हानं परोपकारं ग्राहानि याना आपालं विचार तथा मदत बिल ।

जनसंख्या जम्मा दीपंखा वःपि (१४०००) भक्तजनपि दु धका चोगुनं दु । सकल प्राणीया जय पुकार याना, दीपंखा चाहुपि निर्विघ्नं ज्यासिधेका विसर्जन क्रिया जुल ।

ध्व खँ नेपाली सम्बत् १८६६ सालस थिलाया घर्मोदस मासिक पत्रस संक्षिप्त रूपं चोयागु नं दु ।

ललितविस्तरे ३२ अध्याये मतया वैगुया महत्त्व सीकेगु प्रमाण दु ।

श्रावणे पौर्णमास्यां वै काममारान् विनिर्जयन् ।

परेद्युर्दिवसे प्रातः स्कन्धमारादयोऽपि च ।

श्रावण पुही, (गुन्हु पुही) श्रावण नक्षत्र, मंगलवार खुन्हु, सर्वार्थसिद्ध बोधिसत्त्वं काम मारयात त्याका संन्यक्संबुद्ध भगवान् या बोधिज्ञान लाना विज्य ना थहे भगवान् बुद्ध जुया विज्याये धुस्यंलि वयां कन्हे खुन्हु, श्रावण कृष्ण प्रतिपदा, (सापारु) खुन्हु सुथसिया प्रथमप्रहरे स्कन्धमार १, द्वितीय प्रहरे क्लेशमार २, तृतीय प्रहरे मृत्युमार ३, तथा चतुर्थ प्रहरे देवमार ४ इन्द्र प्रमुखं हानं मेमेपि काममारादि गणपि असंख्य प्रमाणं लखंलख मुना, भिगु १० भुवन कंपज्बीक नाना प्रकारं

कोलाह ज्वीक हाला, शस्त्र अस्त्र व्वना, अतिभयंकर रूपं दुःख
बीधका बल, तर भगवान् बुद्धं (मार पराजय महा चण्ड प्रभ
धैरु) समाधि योगे चोना तप याना विज्यागु खना, मारगण
फुकं बिस्युं वन ।

तं मुनीन्द्रं महासत्त्वं भगवन्तं तथागतं ।

नमकृष्ण द्वितीयायां तैःसर्वैःसमपूजयन् ॥

शनंलि वया कन्दे खुन्दु भावण कृष्ण या द्वितीया (मतया)
खुन्दु सुथया प्रथम प्रहरंनिसे प्यन्हुतक उद्धलोक फिगु १०
भुवनंनिसे देवतादि व मारगणपि सकल वया, भगवान् बुद्धया
बलवीर्य पराक्रम खना, नानोत्सवं पूजादियावल । थ्वहे प्रमाणं
मतया वगु धका सीकेगु ।

१.	वै.	वज्रला,	हरि हरि वाहन लोकेश्वर,	षट्भुजांगुलि तारा
२.	व्ये.	तछला,	त्रैलोक्य वशकर लोकेश्वर,	जांगुलि तारा
३.	आ.	दिला,	रक्तानन लोकेश्वर,	आर्य्य महा तारा
४.	आ.	गूँला,	नोलकण्ठ लोकेश्वर,	रुप्तलोचनी तारा
५.	भा.	अला,	मायाजाल लोकेश्वर,	आर्य्यपुष्प तारा
६.	आ.	कौला,	षडक्षरि लोकेश्वर,	खदिरवती तारा
७.	का.	कछला,	अमोघपाश लोकेश्वर,	महत्तरो तारा
८.	मं.	बिला,	लोकनाथ लोकेश्वर,	वरदा तारा
९.	पौ.	पोहँला,	हलाहल लोकेश्वर,	आर्य्यवज्र तारा
१०.	मा.	सिला,	खसर्प लोकेश्वर,	चित्तचक्र तारा
११.	फा.	चिला,	सिंहनाद लोकेश्वर,	शीतप्रभा तारा
१२.	चै.	चउला,	पद्मनृत्येश्वर लोकेश्वर,	महाशीतवती तारा

ध्व १२ मैत्राया १२ लोकेश्वर पिनि यःयः शक्ति १२ आर्य-
तारापिं धका सीकेगु । १०८ लोकेश्वर व हानं आर्य तारा-
गणपिं दु, लिपा (सुरदर्पण) धैगु सफू, प्रकाश व्वावदं क्यना
हये, स्वया विज्याहुँ । ध्वलं लोकेश्वराऽवदाने दु ।

मञ्जुश्री गुरु शिरसतया, जि गुरु पं० माधवनाथ व्याकर-
णाचार्य स्मरण याना, नित्य बहिसिया ८ बजेनिसें ११ बजेतक
बौद्धशास्त्र अवदान कथा पुराण सोया तिनि छनेगु चलनजूया
निमित्त थौं तकया नेवाभापां अनुवाद याये सिधगु पुस्तकया—

नामावली

- | | | |
|-------------------------|---------------------|----------------------|
| १. गुणकारणव्यूह, | ११. धातु तेजावदान, | २४. नामदर्पण |
| २. लक्ष्मचैत्यावदान | १२. रत्नव्यूहावदान | २५. भविष्य वाणी |
| बुद्ध भगवान्‌या जन्म | १३. चन्द्रप्रभावदान | २६. गंगारयावदान |
| चरित्र | १४. महादीपावदान | २७. शूकावदान |
| ३. हंसावदान | १५. शिवदत्तावदान | २८. वालार्कस्तुति |
| ४. मातृपोष गजावदान | १६. शिविराजावदान | २९. भक्तिशतक |
| ५. वानरावदान | १७. मत्स्यावदान | ३०. तारापाराजिका |
| ६. शशकावदान | १८. प्रशादर्पण | ३१. स्वायंभूपुराण |
| ७. रुपावती स्त्रीजन्मा- | १९. वाक्यदर्पण | ३२. आर्यपितृमतिसूत्र |
| वदान | २०. क्रियादर्पण | ३३. नेपालवर्षक्रिया |
| ८. व्याघ्रीसुतावदान | २१. स्तोत्रदर्पण | ध्व सफूत विस्तारं |
| ९. वृषजन्मावदान | २२. सिद्धिदर्पण | प्रकाश जुया वइगु |
| १०. सर्वज्ञमित्रावदान | २३. सुरदर्पण | जुल— |

ध्व पुस्तक व हानं मेमेगु पुस्तकनं प्रकाश यायेत मुख्य
सहयोगविषया चन्दा प्रदान याना विज्यापि दातातेगु—

नामावली

पश्चिम १ नम्बर सौंगुवजार श्रीधार-	वै. गणेशराज छायेवाहा	५।
लीसिंघ ५०।	पुण्यराज अनहे	२।५०
स्वर्गोय बेखामान्ति शाक्य ल. पु.	जितमेर नत्वा	५।
इकुननि १००।	पद्ममेर अनहे	५।
पं. आ. का. भिषगाचार्य अथननी २१।	जोगरत्न मिखावाहा	५।
वै. बुद्धकान्छा. दौवाहा २०।	समन्तरत्न अनहे	५।
विश्ववज्र आनन्दवाहा १०।	हेरावज्र काभ	५।
अष्टमाया गुभानी चंगापुर १०।	चन्द्रवज्र अनहे	५।
शिवयकुं अनचोम १०।	वै. आशाकाजी मेताकु	३।
वेखारान शाक्य अनहे ६।	दानवज्र आनन्दवाहा	२।
हर्षवाहादुर अकिवाहा ५।	पूर्णवाहादुर भतापो	५।
वज्रवाहादुर अनहे ५।	लालमाया हवाहा	५।
मेजुलदमी अनहे २।५०	कृष्णमाया वालिक	५।
हेरमान्ति न्यात्राचू ५।	विष्णुलालसाहु हाल कंभि	५।
विद्यार्थी सद्धर्मराज अथननी २।	मुनिराज कंति	५।

सूचना—

अमृतासव औंस ५ या मू. ४।

श्व बासलं द्विकुवैगु, वमनज्वीगु, रक्तपित्त, क्षण,
काश, श्वास, हृद्रोग, गरमीया रोग, अम्लपित्त, स्त्रीरोग
इत्यादियात दमन याना याकनं तागत बी, हानं शरीर
पुष्ट्रजुया बल समेतं दयावै, धातुनं बढे ज्वी, मिखा
स्याना चोपिन्तनं आपालं हितकारी ज्वी ।

हानं म्मी मनुते ग्वालि तज्यागुलि ज्वीगु वासनं
दु, वत्ता १ या ध्यवा । २५ .

मचातेत औसाया वास व मेमेगुनं केहि दंढहे
प्राप्त ज्वीगु दु ।

थाय्— वै. आशाकाजी

भैषज्यराज औषधालय,

ल. पु. अथननी ।